



Tē 4 kī 2000/11/20

2000 nī 5 gòeh 20 jít chhòng-khan

◆ Chóng-pian-chíp

Tēⁿ Sī-chong

◆ Pian-chíp kap Khan-thâu Siat-kè

Koa Khá-lē

◆ Publisher

Ko-hiông Tâi-gí Lô-má-jī Gián-síp-hōe

Lán ê Ôe-gí sī

Tâi-ôan Bó-gí

10/24/2000

Tiuⁿ Hók-chū Hōe-tiúⁿ

Tùi 2001 nī 9 gòeh khai-sí, lán Tâi-ôan kàu-iòk pō kui-tēng tī kok-bîn hák-hāu ài ũ bó-gí kàu-iòk ê khò-thēng. Che sī lán Tâi-ôan lāng put-chí-á sin-khó chia h cheng-chhú--tiòh..ê. Sī Tâi-ôan lèk-sú, mā-sī jîn-lūi lèk-sú ê tōa tâi-chì! M̄-kú, kàu-iòk pō ká lán ê GCB gí, Kheh-ōe kap Hō-ló ōe chóng-chheng kiò-chò hong-thó gí-giân, ká hák-hāu cheng-kui kàu-iòk teh iōng ê Hōa-gí kiò-chò kok-gí. Kok-gí sī kok-ka-kip..ê, sī tōa..ê, ko-ngá..ê; hong-thó gí-giân sī tē-hng-sèng..ê, sī sè..ê, chhō-siòk..ê. Che lán chhōa-thâu tōa siaⁿ hóan-tùi kàu-té!

Lán ê ōe-gí hō-chò ***Tâi-ôan Bó-gí!*** Pau-hâm GCB gí, Kheh-gí kap Hō-ló ōe.

Bó-gí sī sím-mih? Bó-gí chit-ê sū ê lâi-gôan sī Eng-gí ê ***mother tongue***. Mother tī Eng-gí ê i-sù pau-koat seng-bút siōng ê a-bó, mā pau-hâm it-chhè ê kin-gôan, lâi-gôan, sím-chì thó-tē. ***Mother Nature*** tiòh-si tâi chū-jiân. Ân-ne lán tiòh chai-iaⁿ bó-gí chit-ê sū chòat-tùi m̄-nā kan-ta piáu-sī a-bó ê ōe nā-tiāⁿ! Lūn-chin lâi kóng , èng-kai sī ũ pau-hâm tong-tē ê lèk-sú bûn-hòa, sū-bút kin-gôan, kap thó-tē ê ōe-gí chia tiòh. Kóng kàu chia lán tiòh chin chheng-chhó, sím-mih khoán ê ōe-gí chia sī lán ê bó-gí? Chhiang-chāi ũ lāng ē ká góa kóng: "Tâi-ôan lāng kóng ê ōe tiāⁿ-tiòh sī Tâi-gí, kiám m̄-sī? " Che khak-khak sit-sit sī hō góa khùn-jiáu ê tâi-chì! Bí-kok lāng kóng..ê it-tēng sī Bí-gí; Jit-pún lāng kóng..ê mā chòat-tùi sī Jit-gí. Che bô siáⁿ thang chèⁿ. Bûn-tê sī: Tâi-ôan lāng kóng..ê kiám tiāⁿ-tiòh sī Tâi-gí? "Chúi-kóng phòa-khang," pháiⁿ kóng! 1940 nī-tâi, chiok chē lāng lóng kóng Jit-pún ōe. Chhiáⁿ m̄ng: "Jit-pún ōe sī Tâi-gí?" Saⁿ hòe gín-á mā chai-iaⁿ m̄-tiòh!

Tī chia, lán koh chit pái tōa-siaⁿ hoah-chhut: Lán ê bó-gí sī Tâi-ôan Bó-gí! Pau-hâm GCB gí, Kheh-gí kap Hō-ló ōe!
